

T. LVCRETI CARI

concipere, ut merito rubeant ignisque profundant. 210  
hasce igitur cum ventus agens contrusit in unum  
compressitque locum cogens, expressa profundunt  
semina quae faciunt flammae fulgere colores.  
fulgit item, cum rarescunt quoque nubila caeli.  
nam cum ventus eas leviter diducit euntis 215  
dissoluitque, cadant ingratis illa necessest  
semina quae faciunt fulgorem. tum sine taetro  
terrore et sonitu fulgit nulloque tumultu.

Quod superest, (quali) natura praedita constant  
fulmina, declarant ictus et inusta vaporis 220  
signa notaeque gravis halantis sulphuris auras.  
ignis enim sunt haec non venti signa neque imbris.  
praeterea saepe accendunt quoque tecta domorum  
et celeri flamma dominantur in aedibus ipsis.  
hunc tibi subtilem cum primis ignibus ignem 225  
constituit natura minutis mobilibusque  
corporibus, cui nil omnino obsistere possit.  
transit enim validum fulmen per saepta domorum,  
clamor ut ac voces, transit per saxa, per aera,  
et liquidum puncto facit aes in tempore et aurum, 230  
curat item vasis integris vina repente  
diffugiant, quia nimirum facile omnia circum  
collaxat rareque facit lateramina vasis  
adveniens calor eius et insinuatus in ipsum  
mobilitate soluens differt primordia vini. 235  
quod solis vapor aetatem non posse videtur  
efficere usque adeo pollens fervore corusco.  
tanto mobilior vis et dominantior haec est.

Nunc ea quo pacto gignantur et impete tanto  
fiant ut possint ictu discludere turris, 240